


Liebi Frau Mumenthaler

Jetzt isch es scho 6 Monet her wo ich uss winterthur ewäg und in Therwil in mi neus dehei zoge bi. Am Afang isch es nit so eifach gse für mi, ich has fascht nit chönne glaube, dass ich jetzt e deheime ha. Ich bi denn immer sehr nervös gse, und ha mini neuu Familie drmit au ganz nervös gmacht. Aber das het sich mitlerwiile glegt und ich vertrau mini Mensche immer meh. Mir hän scho ganz viel erläbt in dere Ziit. Ich darf jedi Nach mit ihne im Schloofzimmer uff mim eigene weiche Bett schloofe, au uff em Sofa ha ich mi plätzli gfunde. Stricheleinheite gits massehaft, und gpielt wird au täglich. Mir göhn jede Tag use go langi spaziergäng mache, im halbe Leimetal bi ich scho gse, und eimol sogar im



Schwarzwald. Ich ha au scho ganz viele Fründe gfunde aber eine isch ganz e bsundere, dr Amor mit ihm tob ich am liebste umme, er isch so e richtig rassige Schäferhund Italiano. Natürligg isch d'Schuel au nit z kurz cho. Es chunnt e ganz e nätti Frau und git mine Mensche Tipps. Do ich am Ahfang gar nit guet gfolgt ha, ha ich ganz lang immer an dr Schleppeleine miesse si, aber mittlerwile folge ich scho ganz guet und darf au immer öfters frei si, usser wenn e Katz umem isch, denn sin d'Ohre uff durchzuug. An dr Leine laufe isch au kei Problem me für mi und natürligg Sitz, Platz,

Chumm, Aus, Warte und was es no so git cha ich au scho guet. Mi Menschefrau seit immer ich bi e ganz e gueti. Bsuech ha ich gar nit gärn, ich ha immer sgfühl ich muess mini Mensche beschütze . Au mag ichs nit eso wenn mi denn die Lüt ahlänge, ich bechumm denn Angst, dass ich wieder ewäg muess. Wenn sich öper dr Wohnig nöcheret denn muess ich ganz fescht bälle, mini Mensche sage mir denn scho, dass ich nit muess uffpasse aber glaube due ich ihne das nonig so ganz. Natürligg stell ich amigs au e chli Schabernack ah. Ich mags zum Bispiel gar nit wenn irgendwo Nastüechli ummeligge, die mien denn verrisse wärde. Au s Papier störrt mi amigs in dr Box und d'Schueh hän au scho miesse dra glaube. Aber wüsse si Frau Mumenthaler mini Mensche mien immer schmunzle, schimpfe dien si fascht nie mit



mir. Wenn d'Öpfel uff em Tisch inere schöne Schale sin denn cha ich eifach nit widerstoh (mini Mensche sin aber Schlau und stelle si jetzt immer ewäg) Ich bechumm zwar gnueg zässe aber me weiss jo nie, ich ha friener halt scho amigs ganz fescht miesse hungere dorum nimm ich jetzt was ich kriege cha.

Sie gsehn es goht mir sehr guet do, ich föhl mi pudelwohl. Ich ha es deheime gfunde wo mi Mensche fescht gärn hän und allerlei mit mir mache und guet zu mir luege. Im Summer göhn mir sogar in d'Ferie hän si

gseit, uff Spanie ans Meer. Uiiiiiiii do bi ich gspannt was das isch und wies dört wird si. Aber solang mini Mensche drbii sin wird's sicher toll.

Ich schigg Ihne ganz vieli liebi Griessli und wenn si emol in dr nöchi sind denn gits sicher e Kaffi bi uns.

Pepper (Pica) so heiss ich jetzt und me seit das pass sehr guet zu mim
Temperament



